

## Máttááttâs- já kulttuurministeriö sehe Máttááttâshaldáttâs puávdejuh servád sámmilij aalmugpeeivi juhломân!

Sámmilij aalmugpeeivi lii 6. peivi kuovâmáánu. Tot lii tuáistáázân vala nuorâ juhlepeeivi, peivi merkkui syemmiláš kalenderân ive 2004. Peivi meridui aalmugpiäiván kuittâg jo ive 1992 já juhlepeeivi tuávááh láá paijeel čyeti ive tyehin ivveest 1917. Talle Taažâ Ruándimist lâi vuosmuš tave-eennâmlâš sámičuákkim. Čuákkim ulme lâi suogârdállâđ sámmilij eellimmáhđulâšvuodâid já celkkid uáivilijd aššijd, moh kyeskih sámmilijd. Puáhtá ettâđ, et sámmilij poolitláš tiäđulâšvuotâ lii šoddâm talle. Aalmugpeeivi lii ohtâ sámmilij jieijâs lippupeevijn, mut ton lasseen Suomâ, Ruotâ já Taažâ virgeomâhááh avžuutteh almoli liputtem.

Eidu valmáštum kulttuurärbibarometri puátuseh čäittih čielgásávt, et ulmuuh halijdeh varjâlid jiejas kulttuurärbi já -pirrâduv. Västideijeh nomáttii tehálumos äššin, maid kalga varjâlid, luándu, pirrâduv, taavijd, ärbivuovijd já tyeje sehe kielâ. Máttááttâs- já kulttuurministeriö sehe Sämitigge láá ráđádállâm kuulmâihásii káidusohtâvuodâid kevttie máttááttâs ovdedemtoomâst, main puáhtá pyerediđ eromášávt sámičuávu ulguubeln ässee párnái máhđulâšvuodâid finniđ tievâsmittee sámičielâ máttááttâs.

-Eenikielâ lii tot niávvu, moin mij pyeremustáa pyehtip oovdân jieččân, tobdoid, jurduid sehe addiittállâp nubijguin. Lii lamaš suotâs uáiniđ maht sáminuorah árvusteh jiejas kielâ já kulttuurärbi sehe halijdeh visásmittiđ tom jotkum, máttááttâsminister **Sanni Grahn-Laasonen** čiálkká.

Máttááttâshaldáttâs válduhovdá **Olli-Pekka Heinonen** tiäduť, et sámmilij aalmugpeeivi viettim škoovlâst uásild olášut meid vuáđumáttááttâs máttááttâsvuávám vuáđustâsâi linjáamijd, moi mielđ škovlâ siärvusin, mast láá naavcah oppâđ, puáhtá oovdân sámičulttuur merhâšume Suomâst. Tot oovded ovtâskâs ulmui já juávhuvi koskâsii iberdem já kunnijâttiem sehe ovdâsvástádâsláš tooimâid. Škovlâsiärvusist kalga tiettiđ, et vuoigâđvuotâ jieijâs kielân já kulttuurân lii vuáđuvuoigâđvuotâ.

-Sámmilij aalmugpeeivi addel šiev máhđulâšvuodâ uápásmuđ sámmiláid Euroop áinoo algâaalmugin sehe sámmilij kulttuurtradition, Heinonen paahud.

Sámmilij aalmugpeeivi tooimâin puáhtá kevttiđ amnâstuv, maid Máttááttâshaldáttâs lii pyevtittâm ohtsâšpargoost Sämitiggijn. [www.oktavuohta.com](http://www.oktavuohta.com) -sijđoin kávná tiäđuđid sámmilijn, sámičielân, sámičulttuurist sehe material já pargoniävuid máttááttâs várás.

Sámmilij aalmugpeeivi viettim puáhtá čuávvuđ meid mediast. Yle Säämi čuávu aalmugpeeivi tábáhtusâid oovtâst naaburenâmij säämi radio- já tv-toimâttuvâigijn, sehe radio- já tv-vuolgáttâsâin et neetist já sosiaalláš mediast.

Máttááttâshaldáttâs lii nomáttâm sámmilijd já sámičulttuur meid válduteeman euroopláš kulttuurärbi-ive 2018 viettimist.

Lasetiäđuđ Máttááttâshaldáttâsâst:

Máttááttâsräđiolmooš, ohtâduv hovdá Leena Nissilä: [leena.nissila@oph.fi](mailto:leena.nissila@oph.fi)

Máttááttâsräđiolmooš Susanna Rajala: [susanna.rajala@oph.fi](mailto:susanna.rajala@oph.fi)

pajetärhisteejee Maria Edel: [maria.edel@oph.fi](mailto:maria.edel@oph.fi)

Máttááttâsräđiolmooš Paula Mattila: [paula.mattila@oph.fi](mailto:paula.mattila@oph.fi)

Lasetiäđuh Máttááttâs- já kulttuurministeriöst:

Spesiališedeijee Daniel Sazonov: [daniel.sazonov@minedu.fi](mailto:daniel.sazonov@minedu.fi)

Máttááttâsräđiolmooš Anne Onnela: [anne.onnela@minedu.fi](mailto:anne.onnela@minedu.fi)